

Llunes, 7 d'abril del 2025

Educación empieza una campaña nueva pa incentivar la matriculación en llingua asturiana y eonaviegu

- La iniciativa va desenvolverse en trés fases, coincidiendo colos periodos de solicitú de plaza y d'inscripción
- El Principáu va repartir en los centros d'enseñanza cartelos, folletos, bolígrafos y marcapáxines col calendariu escolar

La Consejería d'Educación empezó güei una campaña nueva pa incentivar la matriculación pal cursu escolar que vien del alumnáu de Primaria, Secundaria y Bachilleratu en llingua asturiana y eonaviegu en centros sosteníos con fondos públicos. La iniciativa va desenvolverse en trés fases: enantes y nel periodu de solicitú de plaza y cinco díes primero d'empezar la inscripción.

La campaña publicitaria, que lleva de lema Apúntome, va difundise en medios impresos, dixitales y nes redes sociales Facebook y Instagram. La consejería intenta otra vuelta compaxinar los formatos tradicionales colos canales de comunicación más usaes pola xente mozo.

La primer fase empieza güei y va allargase hasta'l 11 d'abril. La promoción va parar a lo llargo de la Selmana Santa y va volver nuna segunda folada del 21 al 25 d'abril. El plazu de presentación de solicitúes d'almisión va ser del 21 d'abril al 6 de mayu.

P'acabar, el tercer ciclu va desenvolverse del 13 al 23 de xunu. Otra manera, el periodu de matriculación va ser del 18 al 25 de xunu pal alumnáu de Primaria, y del 30 de xunu al 11 de xunetu pa Secundaria y Bachilleratu.

La iniciativa empondera la diversidá llingüística y cultural, los beneficios de les llingües d'Asturies en toles etapes educatives y la so rellación colos señes d'identidá autóctones. Tamién incluye un lema adaptáu al públicu oxetivu, que sorraya la ufierta nes enseñances obligatories y el Bachilleratu.

Nota de prensa

La campaña diríxese a la comunidá educativa y a la ciudadanía en xeneral, con un diseñu visual atractivu, un llinguaxe cenciellu afayadizu pa tolos públicos y non sexista. Ye moderna, dinámica y d'alcuerdu con una sociedá que favorez la convivencia, la integración y les tradiciones. Cada acción utiliza la etiqueta #educallingua.

La llingua asturiana ye una materia d'ufierta obligatoria nes etapes educatives de Primaria, ESO y Bachilleratu, pero que s'estudia de forma voluntaria dafechu. L'alumnáu interesao pue solicitala al comienzu de cualquier cursu, independientemente de qu'escoyere otra optativa enantes.

Los conteníos de la campaña tán disponibles nel portal Educastur (www.educastur.es/asturiano/centros), onde figura tamién información básica sobre estes enseñances y les feches de matriculación.

Materiales de refuerzu

Otramiente, la consejería va complementar la campaña col repartu en tolos centros educativos d'una serie de materiales pa fomentar la matriculación. La entrega va empezar estos díes y va realizase en trés fases.

Primero, van unviase cartelos informativos a los centros d'enseñanza. Más p'alantre, van mandase folletos y bolígrafos a tol alumnáu escolarizao. Y, de cara al periodu de matriculación, van repartise marcapáxines col calendariu escolar del cursu que vien.

Esta campaña respunde al compromisu de la Consejería d'Educación de promover l'usu, la difusión y la enseñanza del asturianu y l'eonaviegu, en cumplimientu de la Llei 1/1998, de 23 de marzu, amás de potenciar la pluralidá llingüística y cultural del Principáu.

La iniciativa coincide, amás, con un cursu escolar onde la materia de Llingua Asturiana y Lliteratura rexistró la cifra más alta d'alumnáu de los últimos años, con una medría del 1,2 % d'estudiantes.